

ՀԱՅԱՍՏԱՆ-ՎՐԱՍՏԱՆ ՀԱՐԱԲԵՐՈՒԹՅՈՒՆՆԵՐԸ ԵՎ
ՀՈՂԱՅԻՆ-ՏԱՐԱԾՔԱՅԻՆ ՍԱՀՄԱՆԱԶԱՏՄԱՆ ՀԻՄՆԱՀԱՐՑԵՐԸ
1926-1937 ԹԹ. *

Վանիկ Վիրաթյան

Բանալի բառեր՝ Վրացական ԽՍՀ, Հայկական ԽՍՀ, Լոռի, Ախալքալաք, Բորչալու, սահմանազատում, հողահանդակ, հողային-տարածքային վեճեր, սահմանագիծ, պայմանագիր:

1925-1926 թթ. սահմանագծին հայ-վրացական հարաբերությունները թևակոխեցին հանգուցալուծման նոր դժվարին փուլ: 1926 թ. հունվարի 8-ին Կենտգործկոմին ուղղված գրությունում ՀՀ հողժողկոմը, արձանագրելով այն փաստը, թե իբր 1921 թ. նոյեմբերի 6-ի ակտով լուծված էր համարվում Վրաստանի և Հայաստանի սահմանային խնդիրը, որ 1922 թ. սեպտեմբերին երկու հանրապետությունների հողժողկոմատների փոխադարձ համաձայնությամբ վիճելի տարածաշրջանը փաստորեն անցել էր Հայաստանին, նշում էր, որ, այդուհանդերձ, Վրաստանի հողժողկոմատը այնուհետև հիշյալ սահմանն անբնական է համարել՝ ներկայացնելով սահմանային հարցի լուծման այլ նախագիծ՝ Լոք-Լալվարի ուղղությամբ: Ելնելով դրանից՝ ՀՀ հողժողկոմը, անընդունելի համարելով վերոնշյալ որոշումը, հարց է բարձրացնում Անդրկենտգործկոմի առջև՝ խնդրելով հաստատել 1921 թ. նոյեմբերի 6-ի համաձայնության պայմանները և հանձնարարել հողժողկոմատին տեղում ընդունելի համարել համապատասխան սահմանագիծը[1]:

1926 թ. ապրիլի 27-ին ՀԽՍՀ հողժողկոմ Արամայիս Երզնկյանը Անդրկենտգործկոմի հանձնաժողովին ներկայացրած պաշտոնագրում արձանագրում է այն փաստը, որ Փամբակ-Լոռու և Բորչալու գավառների վերջնական սահմանագծման հարցը հատուկ հանձնաժողովի կողմից տեղազննությունից հետո Սադախլոյում չլուծվեց միայն այն պատճառով, որ Վրաստանի հողժողկոմատի ներկայացուցիչները համաձայնություն կայացնելու առիթով վերջնական ցուցում չէին ստացել: Ըստ այդմ՝ Ա. Երզնկյանն իր վերընշյալ տեսակետը հիմնավորում էր հանձնաժողովի աշխատանքների արդյունքներով:

1) 1921 թ. նոյեմբերի 6-ի համաձայնությամբ ուղղումներով հանդերձ որոշված սահմանագիծը կարելի է անցկացնել վիճարկելի համարվող վայրում:

2) ապացուցված համարել, որ Վորոնցովկայի գավառակի բոլոր գյուղերը սուր կերպով են զգում շրջանի անտառի կարիքը, իսկ նրանց սահմանամերձ անտառից գրկելը անթույլատրելի գտնելով, փաստում էր, որ Ալավերդու պղնձահանքերը միշտ օգտվել են սահմանամերձ շրջանի անտառներից:

3) Երզնկյանը կարծում էր, որ 1921 թ. սահմանագիծը չէր կարող կյանքում կիրառվել այնպիսի ձևով, որ ոչ մի դժգոհություն առաջ չբերեր երկու կողմերի գյուղացիության կողմից:

4) արձանագրել, որ 1921 թ. սահմանագիծը չի շոշափել նաև Շարուրի գործարանի շահերը, որ Փամբակ-Լոռու գավառին միացված անտառաշրջանում գործարանը պետք է օգտվի մի տարածությունից, որը դյուրությամբ կարող են փոխանակել Բորչալու գավառի 60 հազար դեսյատին տարածքի՝ Պրպնջանի և Չանդարի միջև ընկած անտառների հետ:

* Հոդվածն ընդունվել է 10.09.19:

Հոդվածը տպագրության է երաշխավորել խմբագրական խորհրդի անդամ ՀՊՄՀ պրոֆեսոր, պ.գ.դ. Ս. Պողոսյանը: 30.09.19:

Երզնկյանը նշել էր, որ այդ տարբերակի դեմ Վրաստանի Հողփողկոմատի ներկայացուցիչները ներկայացրել են անհեթեթ առարկություններ[2]: Նա ընդգծել էր, որ Անդրկենտրոնական, Վրաստանի Հողփողկոմատի ներկայացուցիչների միջոցով կատարած տեղագնությունից հետո մերժվել է հայկական կողմի նախագիծը: Ելնելով այդ ամենից, Երզնկյանը գտնում էր, որ Վրաստանի հողփողկոմատը ևս պետք է հրաժարվի նախագծի իր տարբերակից՝ վերջնականապես հաստատելով 1921 թ. նոյեմբերի 6-ի սահմանագծումն այն փոփոխություններով, որ ընդունելի լինի կողմերի կողմից: Չշրջանցելով իրենց ներկայացրած նախագիծը՝ նա հայտնում էր, որ այն կազմելու ժամանակ հաշվի են առնվել Անդրկենտրոնական և Վրաստանի Հողփողկոմատների հիմնական պահանջները՝ պնդելով, որ 1921 թ. համաձայնությունն անցնում է բնական անվիճելի գծերով և տարածքային ու անտառային ֆոնդի հարցում կողմերից ոչ մեկի համար աննպաստ դրություն չի ստեղծում[3]:

Սակայն 1926 թ. մայիսին կրկին անհրաժեշտություն առաջացավ ձգարտել Անդրկենտրոնական Հողհանձնաժողովի կողմից այդ պահին որոշված սահմանը և այդ խնդիրը լուծելու համար Վրաստանի և Հայաստանի ներկայացուցիչների մասնակցությամբ հրավիրվում է խորհրդակցություն, որում սակայն համաձայնություն ձեռք չի բերվում[4]: Խնդրահարույց հարցի լուծման համար հանրապետությունների հողփողկոմների և ներկայացուցիչների մասնակցությամբ կատարվում է վիճելի տարածքների նոր հետազոտում՝ պարզելու նրանց տնտեսաքաղաքական հակվածության հիմքերը: Այդ խնդրի իրագործման նպատակով Ստուրուայի նախագահությամբ կազմվում է հանձնաժողով, որում ներգրավվում են նաև Վրաստանի և Հայաստանի հողփողկոմները, գավառային գործկոմների ներկայացուցիչները: Հայաստանի Կենտրոնական 1926 թ. նոյեմբերի 3-ի արձանագրությունից պարզվում է, որ ՀԽՍՀ ԿԳԿ-ի նիստը լսել է Վերին և Ներքին Քերպիլի գյուղերի բնակիչների միջնորդության հարցը՝ այդ գյուղերը Վրացական ԽՍՀ-ի կազմում ընդգրկելու մասին հիմք ընդունելով Անդրկենտրոնական նախագահության ապրիլի 20-ի և Հողփողկոմատի հունիսի 7-ի որոշումները, որի մասին գեկուցումով հանդես է գալիս Հայաստանի ԿԳԿ-ի քարտուղար Ա. Տատյանը: ՀԽՍՀ Կենտրոնական նախագահ Ա. Կարինյանի և Տատյանի ստորագրությամբ ընդունված որոշման մեջ հայկական կողմը Անդրկենտրոնական խնդրում էր իրենց գյուղերը Վրացական ԽՍՀ կազմում ընդգրկելու մասին քերպիլիցիների միջնորդությունը մերժել և թողնել առանց հետևանքի՝ պնդելով, որ նրանց հայտարարությունը ծագել է հողային վեճերից, որոնք պետք է վճռեին ՀԽՍՀ իշխանությունները, և ըստ այդմ Հողփողկոմատին առաջարկում էր շտապ միջոցներ ձեռնարկել Վերին և Ներքին Քերպիլիների հետ հողային վեճերը կարգավորելու համար և այդ մասին գեկուցել ՀԽՍՀ Կենտրոնականին[5]: Ակնհայտ է այստեղ ՀԽՍՀ իշխանությունների շահագրգռվածությունը հողային հարցերը հօգուտ Հայաստանի լուծման հարցում:

ՀԽՍՀ Կենտրոնական 1926 թ. դեկտեմբերի 29-ի նիստում տեղեկացվում է 1927 թ. հունվարի 2-ին Թիֆլիսում կայանալիք Անդրկենտրոնական հողհանձնաժողովի նիստի մասին՝ քննարկելու Շինիխ-Այրում, Լավար, Գերաս-Չայ-Արաքս շրջանների միջև ծագած վեճերի, արոտավայրերի խնդիրը՝ կապված քոչվոր անասնապահության վերացման հեռանկարի հետ:

Տատյանի գեկուցման հիման վրա 1927 թ. հունվարի 2-ին որոշվում է 1927 թ. հունիսի 2-ին Թիֆլիսում կայանալիք հողհանձնաժողովի աշխատանքներին մասնակցելու համար գործուղել Հայկենտրոնականից Ա. Երզնկյանին, Չանգեզուրի և Մեղրու գավառներում Ն. Աղոյանին և Լոռի-Փամբակի գավառներում Յու. Հովսեփյանին[6]: 1927 թ. հունիսի 6-ին Հայկենտրոնականում արձանագրվում է, որ Աղքորպի, Չանախչի, Ջիլիգա և Բրդաձոր գյուղերն անտառային շրջանի հետ Վրաստանի հետ վիճարկելի չեն[7], իսկ հունիսի 8-ին նշվում է, որ բնակելի այլ վայրերի համար հարևան հանրապետությունների հետ ձևակերպված վեճ գոյություն չունի, որ Անդրկենտրոնականը որո-

շում ունի, որ կողմերից նոր վեճերի հայտեր այլևս չի ընդունելու և քննության չի առնելու[8]:

1927 թ. հունիսի 20-ին Ս. Կասյանի և Ա. Գեգեչկորու համանախագահությամբ տեղի ունեցած Անդրկենտգործկոմի նախագահության նիստում քննարկվում է Անդրֆեդերացիայի հանրապետությունների միջև հողային-անտառային վեճերի լուծման հանձնաժողովի կանոնադրության նախագծի հարցը: Միաժամանակ Անդրհողժողկոմատին հանձնարարվում է կազմել ընդհանուր հեռանկարային պլան՝ ծնռանը և ամռանը ալպիական մարգագետինների արոտավայրերում կազմակերպվող քոչվոր և կիսաքոչվոր անասնապահությունից կուլտուրական հողագործությանը անցնելուն նախապատրաստվելու համար[9]:

1927 թ. սեպտեմբերի 19-ին Անդրկենտգործկոմի նախագահության նիստը Ադամալի-Օղլու նախագահությամբ լսում է Կրաստանի Բորչալուի և ՀԽՍՀ Լոռի-Փամբակի գավառների միջև ընկած Լոք-Լալվար վիճելի տարածաշրջանում վարչատնտեսական սահմանագծի հաստատման հարցը: Կայացված որոշման մեջ հաշվի առնելով Լոք-Լալվարի տարածաշրջանի իրական բնասահմանի հաստատման համար ստեղծված հանձնաժողովի նախագահի պարտականությունների կատարման անհնարինությունը՝ որոշվում է վերջինիս փոխարեն այդ պաշտոնում նշանակել Բաղիրովին՝ առաջարկելով առաջարկված խնդիրները լուծել մեկամսյա ժամկետում[10]: Ս. Կասյանի նախագահությամբ 1927 թ. դեկտեմբերի 5-ին իրավիքված Անդրկենտգործկոմի նիստում լսվում է նախագահության առաջարկը Լոք-Լալվար շրջանի շրջանակներում Բորչալու գավառի և ՀԽՍՀ Լոռի-Փամբակի գավառների վարչատնտեսական սահմանի հաստատման համար ստեղծված հանձնաժողովի աշխատանքների երկարաձգմանն առնչվող հարցը: Հաշվի առնելով աշխատանքների կատարման ծնռանը հողագծման անհնարինությունը՝ Անդրկենտգործկոմը որոշում է սահմանազատումն իրագործելու համար իր իսկ նախագահության՝ սեպտեմբերի 19-ի որոշմամբ ձևավորված հանձնաժողովին հանձնարարել այդ աշխատանքները կատարել 1928 թ. գարնանը[11]: 1927 թ. հուլիսի 16-ին վիճարկելի հարցերը կրկին քննարկվում են Անդրկենտգործկոմի նախագահության կողմից, սակայն կրկին ոչ արդյունավետ ելքով, առավել ևս որ Բաղիրովը ներկա չի գտնվում այդ նիստին: Նրան փոխարինում էր Յաղուբովը, որին առաջարկվում է Բորչալուի և Լոռի-Փամբակի միջև վիճարկելի վարչատնտեսական սահմանի հարցի լուծման ուղղությամբ տարվող աշխատանքներն ավարտին հասցնել մինչև հուլիսի վերջը[12]:

1927 թ. Անդրկենտգործկոմի նախագահության ԽՍՀՄ Ազգությունների խորհրդին տված գեկուցման մեջ արձանագրվում է, որ 53 տեղամասերով ընդհանուր 76.635 դեսյատին մակերեսով վիճելի համարվող տարածքից Ադրբեջանին է անցել 8208 դեսյատին, Հայաստանի կազմում ընդգրկվել է 3990 դեսյատին, իսկ Կրաստանի՝ 64.437 դեսյատին հող[13]:

1928 թ. հունիսի 7-ին Անդրկենտգործկոմի Փոքր նախագահությունը Ս. Կասյանի նախագահությամբ լսում է Բորչալու և Լոռի-Փամբակ գավառների միջև վարչատնտեսական սահմանագծման անցկացման Բաղիրովի գլխավորությամբ գործած հողահանձնաժողովի հաշվետվությունը: Ի լրացումն Անդրկենտգործկոմի 1927 թ. դեկտեմբերի 5-ի և 1927 թ. սեպտեմբերի 19-ի որոշումների՝ խնդիր է դրվում ձեռնամուխ լինել Բորչալու-Լոռի-Փամբակ սահմանագծի ճշգրտմանը և դրանք ավարտել հուլիսի վերջին[14]:

Հիմք ընդունելով Անդրկենտգործկոմի Փոքր նախագահության որոշումը՝ 1928 թ. օգոստոսի 10-ին Թիֆլիսում Ս. Յաղուբովի գլխավորությամբ և Կրաստանի ու Հայաստանի հանրապետությունների հողժողկոմներ Ս. Ջուղելու և Ա. Երզնկյանի մասնակցությամբ ձևավորվում է հանձնաժողով Բորչալու և Լոռի-Փամբակ գավառների միջև Լոք-Լալվարի տարածաշրջանային (Սադախլոյի անտառային ամառանոցավայր) վեճը

քննարկելու համար: Մտքերի փոխանակության արդյունքում հանձնաժողովը անհրաժեշտ և հնարավոր է գտնում նշված վեճը լուծել հետևյալ հիմքերով.

1) իրենց հողերով վիճելի հողաշերտին հարող գյուղերը (խոսքը 1921 թ. նոյեմբերի 6-ի որոշմամբ հաստատված գծի մասին է) այս կամ այն կողմին պետք է անցնեն իրենց բոլոր բաժնեհողերով.

2) բոլոր այն գյուղերը, որոնք կանցնեն այս կամ այն կողմին, ինչպես նաև նրանք, որոնք գտնվում էին կողմերի անվիճարկելի տարածքներում, պետք է իրավունք ունենան, ըստ մինչ այդ գոյություն ունեցող կարգի, հավասարապես օգտվելու Բորչալու և Լոռի-Փամբակ գավառների անտառներից.

3) Լոք-Լավարի լեռնագոգի հյուսիսային լանջին գտնվող ամառային արոտավայրերից օգտվելը ամրագրել մինչ այդ դրանցից օգտվող Բորչալու գավառի անասնապահների օգտին.

4) Չաթախի չուգունաձուլական գործարանին ամրակցել 1923 թ. մայիսի 20-ին Վրաստանի Հողժողկոմատին հանձնված անտառային ամառանոցը, ՀԽՍՀ հողժողկոմատի տնօրինության տակ գտնվող անտառներից Վրաստանին տալ չորս հազար դեսյատին: Միաժամանակ հանձնաժողովը անհրաժեշտ է գտնում սահմանել վարչատնտեսական սահմանագծի ուղղվածությունը Բորչալուի և Լոռի-Փամբակի գավառների միջև Լոք-Լավարի շրջանում. այն ձգվում էր Դեբեդ-չայից, այնտեղից, որտեղ այդ գետին հարում էր Սադախլու գյուղի բաժնեհողերի հարավային սահմանագիծը՝ այն ընդհանուր ձգվածությամբ դեպի արևմուտք մինչև Կարմիր Քար բարձունքը, որից հետո Խոժոռնի և Գյոլբեկինսկի հողերով ձգվում սկզբում դեպի հարավ-արևմուտք, իսկ այնուհետև թեքվելով դեպի հյուսիս-արևմուտք՝ իջնում Բանիոշ գետը, այնտեղ կտրուկ շրջվում դեպի արևմուտք, վեր բարձրանում և իջնում հյուսիս-արևմտյան ուղղությամբ դեպի Շուլավեր-չայ գետը: Ինչպես նախատեսվում էր, այդ կետից դեպի վեր նշված գետի հոսանքով սահմանագիծը հասնում էր մինչև Օփրեթի և Չանախչի գյուղերի վարձակալական հողերը՝ եկեղեցու ավերակի մոտ և այնտեղից նշված գյուղերի վարձակալական հողերի սահմաններով ձգվում մինչև Աղքյորփի-չայը, որտեղից հարավ-արևմտյան ուղղությամբ սահմանագիծը մի շարք բարձունքներով հասնում էր Գայլի Դրունք Լեռնանցքը և այնտեղից հյուսիսարևմտյան ուղղությամբ Լոքի և Օսինովայա լեռնագագաթներով ու Լոքի լեռնանցքով հասնում մինչև համապատասխան բարձունքին:

Նշված սահմանագծի հիման վրա Սադախլու, Գյոլբեգ, Խոժոռնի, Խոխմելի, Օփրեթի և Չանդար գյուղերը իրենց բաժնեհողերով պետք է մնային Վրաստանի Բորչալու գավառի կազմում, իսկ Բերդաձոր, Չանախչի, Աղքյորփի գյուղերը՝ Հայկական ԽՍՀ Լոռի-Փամբակի գավառի ենթակայության տակ: Դրա հետ մեկտեղ ընդգծվում էր, որ եթե վերոնշյալ գյուղերի բաժնեհողերի սահմանները չհամընկնեն սահմանագծման հետ, ապա, անկասկած, առավելությունը պետք է տրվեր բաժնեհողերի սահմաններին, ըստ որի՝ տեղում պետք է իրագործվեին սահմանների համապատասխան փոփոխություններ: Իսկ ինչ վերաբերում էր Օփրեթի և Ջիլիսա գյուղերի միջև Շուլավեր-չայի աջ ափին գտնվող հողավեճին, հրահանգվեց շուռդարձի միջոցով առաջին գյուղին հատկացնել համարժեք տեղամաս Չանախչի գյուղի հողերի հաշվին կամ այլ ձևով, ինչը տեղանքում հետազոտման արդյունքում առավել նպատակահարմար կգտնվեր: Նշված համաձայնագրի ցանկացած փոփոխությունների մասին, որոնք կարող էին բացահայտվել հանձնաժողովի աշխատանքի պարագայում և կհամարվեին անհրաժեշտ ու նպատակահարմար, պետք է զեկուցվեր Անդրկենտրոնի մի հանձնաժողովին, որն անհրաժեշտության դեպքում պետք է մեկներ նշված վայրը[15]:

Հիմնական վեճը Լոռի-Փամբակ-Բորչալուի շուրջն էր՝ տնտեսական-վարչական սահմանի հաստատման և դրա հետ կապված սահմանամերձ շրջանների բնակավայրերի միջև վիճելի հարցերի, ինչպես նաև Լենինական-Ախալքալաքի գավառների միջև անցկացված վարչատնտեսական սահմանի արձանագրության հաստատման հետ:

1928 թ. օգոստոսի 15-ին Անդրկենտգործկոմի նախագահության նիստում Ս. Կասյանի, Ի. Օրախելաշվիլու, Թադիկի և այլոց մասնակցությամբ լսվում է Անդրֆեդերացիայի տարբեր սահմանամերձ շրջանների միջև հողային-անտառային վեճերի մասին հարցը: Այդ կապակցությամբ որոշվում է ի գիտություն ընդունել Ս. Կասյանի հաղորդումը և հանձնարարել Անդրերկրկոմիտեի հանձնաժողովին ի դեմս Ս. Տեր-Պաբրիկյանի, Քարապետյանի և Մուսաբեկովի՝ եռօրյա ժամկետում կարգավորել հողային, հողահանդակային, ջրային և անտառային վեճերը Անդրֆեդերացիայի տարբեր սահմանակից շրջանների միջև: Փաստվում է նաև Հայաստանի և Վրաստանի միջև առկա վիճելի երեք տեղամասի հարցը՝ 21.600 դեսյատին մակերեսով, որոնցից մեկը փետրվարի 29-ին ներառվում է ՀԽՍՀ կազմում: Սույն հարցերն իրենց արտացոլանքը գտան նաև Անդրերկրկոմի քարտուղարության բյուրոյի 1928 թ. օգոստոսի 16-ի նիստում, որի կողմից պաշտոնագրեր ուղարկվեցին Ս. Տեր-Պաբրիկյանին, Քարապետյանին և Մուսաբեկովին[16]:

1929 թ. փետրվարի 2-ին Անդրֆեդերացիայի հանրապետությունների միջև հողային-անտառային վեճերի լուծման հանձնաժողովի (Ադրբեջանի, Վրաստանի և Հայաստանի ժողովնխորհների նախագահներ Մուսաբեկով, Մախարաձե, Տեր-Պաբրիկյան, Անդրկենտգործկոմի քարտուղար Շահվերդյան և Անդրերկրկոմի քարտուղար Օրախելաշվիլի) նիստում լսվում է սահմանագծի ամբողջ երկայնքով Լոռի-Փամբակ և Բորչալու գավառների միջև վարչատնտեսական սահմանի հաստատմանն առնչվող հարցը: Ըստ այդմ կայացվում է որոշում,

1) հաստատել հողժողովման Երզնկյանի և Զուղեյու միջև 1920 թ. օգոստոսի 10-ին ձեռք բերված համաձայնությունը՝ հատուկ հսկողություն սահմանելով ՀԽՍՀ տարածքում գտնվող ջրապաշտպան նշանակություն ունեցող անտառների նկատմամբ:

2) հանձնարարել 1928 թ. օգոստոսի 10-ին ձեռք բերված համաձայնության հիման վրա լուծել բոլոր վիճելի հարցերը և մանրամասն նկարագրել ամբողջ սահմանագիծը, որից հետո այն ներկայացնել Մուսաբեկովի, Տեր-Պաբրիկյանի և Մախարաձեի մասնակցությամբ գործող հողահանձնաժողովի հաստատմանը[17]:

1929 թ. փետրվարի 9-ին Մ. Ցխակայայի նախագահությամբ Անդրկենտգործկոմի Փոքր նախագահության նիստում լսվում են Վորոնցովկայի տեղամասում, Լոռի-Փամբակ գավառում և Դիլիջանում տիրող վիճակի մասին Աղամալովի և Պրեդերաժենսկու զեկույցները, որոնք ընդունվում են ի գիտություն, և Անդրկենտգործկոմի կազմբաժնին հանձնարարականներ են տրվում զեկույցողների հետ համատեղ դրանցում նշված թերությունների վերացման համար ձեռնարկել համապատասխան միջոցներ[18]:

1929 թ. փետրվարի 18-ին Անդրկենտգործկոմի նիստում Ցխակայայի նախագահությամբ լսվում է Լոռի-Փամբակ և Բորչալու գավառների միջև վարչատնտեսական սահմանի հաստատման հարցը և որոշվում Երզնկյանի և Զուղեյու կողմից 1928 թ. օգոստոսի 10-ին ձեռքբերված համաձայնությունը հաստատել՝ անտառները թողնելով ՀԽՍՀ կազմում: Զուղեյուն և Երզնկյանին հանձնարարվում է բոլոր վիճարկելի հարցերը վճռել 1928 թ. օգոստոսի 10-ի համաձայնագրի հիման վրա և մանրամասն նկարագրել ամբողջ սահմանագիծը, հաստատագրելով, որ ընդունված որոշումը հենվում է տեղանքի մանրագին հետազոտության և թերությունների բացահայտման վրա, որոնք խոչընդոտել են հողային վեճերի լուծմանը՝ այդ մասին կայացնելով միաձայն որոշում լիազորված շահագրգիռ անձերի կողմից: Որոշվում է, որ փետրվարի 18-ի վճիռը լինի վերջնական՝ այն իրագործելով ոչ ուշ, քան մինչև 1929 թ. աշունը, գործկոմներին պարտավորեցնելով բնակչությանը լայնորեն իրազեկել այդ մասին, իսկ խախտման դեպքում ենթարկել քրեական և վարչական պատասխանատվության:

Անդրկենտգործկոմին առընթեր հողային և անտառային վեճերի լուծման հանձնաժողովից պահանջվում է ամենայն աջակցություն ցուցաբերել Անդրկենտգործկոմի նախագահության՝ 1929 թ. փետրվարի 18-ի որոշման իրագործման հարցում: Հաստատ-

վում էր, որ ընդունված որոշումների մասին ոչ մի հայտարարություն հարցի վերանայման կամ նոր քննարկման մասին չի կարող ընդունվել և քննարկվել: Անդրկենտգործկոմի 1929 թ. փետրվարի 2-ի նիստում հողային վեճերի լուծման անդամներ Մուսաբեկովի, Տեր-Պաբրիկյանի և Մախարաձեի կողմից ստորագրվում է արձանագրություն: Ըստ ընդունված որոշման՝ Լենինականի (Գյումրիի) շրջանի Դարաբեյ գյուղին 80 դեսյատին հողատարածքի միացման խնդրանքը մերժվում է՝ հիմք ընդունելով 1927 թ. օգոստոսի 13-ի համաձայնության ակտը ՀԽՍՀ Լենինականի շրջանի և ՎԽՍՀ Ախալքալաքի գավառների միջև վարչատնտեսական սահմանի անցկացման վերաբերյալ[19]: 1929 թ. ապրիլին ՀԽՍՀ կենտգործկոմը փետրվարի 18-ի որոշումը կենսագործելու մասին շրջաբերական է արձակում, որի կիրարկումը տեղերում դրվում է Անդրկենտգործկոմին առընթեր հողային ու անտառային վեճերը քննող հանձնաժողովի վրա, որն այդ աշխատանքը պետք է ավարտեր 1929 թ. աշնանից ոչ ուշ: Դրանով Կենտգործկոմի նախագահը տեղեկացնում է Լենինականի, Լոռի-Փամբակի, Դիլիջանի, Նոր Բայազետի և Զանգեզուրի գավառական գործադիր կոմիտեներին, որ վերոհիշյալ գավառագործկոմների և Անդրկովկասի Խորհրդային Ֆեդերատիվ Սոցիալիստական Հանրապետության (ԱԽՖՍՀ) կազմում ընդգրկված հանրապետությունների սամանամերձ գավառագործկոմներին դեռևս բզկատող հողային ու անտառային վեճերի լուծումները համարվում են վերջնական: Այդ պատճառով անմպատակահարմար էին գտնվում Անդրկենտգործկոմին առընթեր հանձնաժողովի որոշումների վերանայումը կամ արդեն լուծված վեճերը նորից քննության առնելու վերաբերյալ դիմումների դիտարկումը[20]:

1929 թ. մայիսի 28-ին Լոռի-Փամբակ շրջանի Վորոնցովկայի գործկոմի նախագահի տեղակալ Սարատիկյանը Հայաստանի և Վրաստանի հողօժոկոմներին հասցեագրած գրությամբ տեղեկացնում էր, որ Վորոնցովկայի տեղական գործկոմի հաղորդմամբ Վրաստանի Բանկոտայր առանց իրենց թույլտվության կտրատել է Շահնագար գյուղի ընկերության հողատարածքը 1520 սաժեն լայնությամբ և անցկացրել է ակու: Այդպիսի վիճակը ոչ նորմալ համարելով, խնդրվում էր միջոցներ ձեռնարկել արձանագրված խախտումները վերացնելու[21]: 1929 թ. հունիսի 8-ին Երզնկյանը և հողային վարչության պետ Սարատիկյանը ՀԽՍՀ Կենտգործկոմին և Վորոնցովկայի շրջագործկոմին ուղղված պաշտոնագրում խնդրում են ներկայացնել Վորոնցովկայի շրջագործկոմի գրությունը Շահնագար գյուղի հողերի սահմանը Թիֆլիսի Բանկոտայի կողմից խախտելու մասին, պահանջելով Անդրկենտգործկոմի հանձնաժողովի ու նրա երկրաչափի միջոցով տեղում ճշգրտել անօրինական սահմանը Շահնագար գյուղի համար[22]:

1929 թ. հուլիսի 22-ին տեղի է ունենում Անդրկենտգործկոմի նախագահության նիստը, որում քննարկվում է Փոքր նախագահության կողմից օրակարգ մտցված Բորչալուի և Լոռի-Փամբակի հողային և անտառային վեճերի հարցը[23] և որոշվում է.

1) հաստատագրել, որ ՀԽՍՀ սահմաններում և Լոք-Լալվար լեռնաշղթայի հյուսիսային լանջին գտնվող անտառները, և մասնավորապես գետերի ակունքները՝ աղբյուրներն ունեն հատուկ նշանակություն ներքին Բորչալուի գյուղատնտեսության զարգացման համար, և մոտ ապագայում ճիշտ անտառային տնտեսության կազմակերպմամբ այդ խոչընդոտները կվերացվեն և օրինակելի ձևով կբարեկարգվեն.

2) անտառների պաշտպանության նպատակներով անհրաժեշտ համարել Զիլիսա գյուղի բնակիչների վերաբնակեցումը Չանախչի գյուղում.

3) Օփրեթի գյուղին իրավունք վերապահել վարձակալման ձևով օգտվել Շուլավեր-չայ գետի աջ ափի հողերից.

4) նկատի ունենալ, որ «Գելիկ թիվ 1» տեղամասը 158 դեսյատին տարածքով գտնվում է Բորչալուի տեղամասային գործկոմի սովխոզի օգտագործման ներքո, այն թողնել ՎՍԽՀ սահմաններում.

5) Շահնագար գյուղի կողմից վիճարկվող 580,80 դեսյատին տարածքով թիվ 2 տեղամասը թողնել Վրացական ԽՍՀ սահմաններում.

6) Սարիար և Սաաթի գյուղերի միջև վիճելի համարվող 63,84 դեկալտին տարածքով թիվ 3 տեղամասը թողնել Հայկական ԽՍՀ կազմում:

7) Օփրեթի և Չանախչի գյուղերի միջև վիճարկելի 633,60 և 102,72 դեկալտին տարածքով թիվ 4 և 5 հողամասերը թողնել ՎՍՍՀ կազմում:

8) Վարդաձոր և Սադախլու գյուղերի միջև վիճարկելի 6,48 դեկալտին տարածքով թիվ 7 տեղամասը թողնել ՀՍՍՀ կազմում[24]: Խնդիր է դրվում սահմանը հաստատել Լեզլի-դաղից մինչև Պոլուբլի-Բաշի լեռնագագաթի դամբարանը՝ Փամբակի շրջանում: Այդ խնդրի լուծման նպատակով Փոքր նախագահության առաջարկով Անդրկենտրոնականի հողային հանձնաժողովում ընդգրկվում են ՀՍՍՀ-ից Երզնկյանը և Մամիկոնյանը, ՎՍՍՀ-ից Ջուղեյին և Վ. Վաշակիձեն, Ադրբեջանական ԽՍՀ-ից՝ Միր Ջաֆար Բադիրովը և Մ. Շամսադինսկին[25]:

Ուշագրավ է ՀՀ հողբաժնի կազմբաժնի վարիչ Գ. Հովհաննիսյանի գրությունը, որտեղ նշելով, որ վերադարձվում է 1930 թ. հունիսի 20-ի գրությունը իր բոլոր նյութերով հանդերձ՝ ներկայացվում էր Կենտրոնականի մեկնակետը, որ աշխատանքները լրիվ կազմով կատարված չեն, որ անհրաժեշտ է ավարտել ՀՍՍՀ-ի գոնե փաստական և լրիվ սահմանը 10 վերստանոց քարտեզի վրա, ուղղել քարտեզն ըստ Անդրկենտրոնականի որոշման, որով Չանախչի, Բարդաձոր և Աղբյուրի գյուղերը հանձնվում էին ՀՍՍՀ-ին[26]:

1932 թ. ապրիլի 11-ին Անդրկենտրոնականի Փոքր նախագահությունը քննարկում է թիվ 2 տեղամասին վերաբերող Բորչալուի և Լոռի-Փամբակի գավառների միջև հողային և անտառային վեճերին առնչվող Անդրկենտրոնականի նախագահության՝ 1929 թ. սեպտեմբերի 2-ի որոշումը՝ փաստելով, որ այն չի կատարվել, և ըստ այդմ ՀՍՀ Կենտրոնականի հանձնարարվում է անհապաղ միջոցներ ձեռնարկել այն իրականացնելու համար[27]:

1932 թ. մայիսի 17-ին Անդրկենտրոնականի Փոքր նախագահության որոշումը դարձյալ վերաբերում էր Վրաստանի և Հայաստանի միջև սահմանների ճշգրտմանը: Միաժամանակ լսվում է Անդրկենտրոնականի հողահանձնաժողովի նախագահի 1933 թ. մայիսի 4-ի զեկուցը, որը վերաբերում էր Բորչալուի և Ղարաքիլիսայի շրջանների միջև հողօգտագործական սահմանների ճշգրտմանը, ներկայացրած առաջարկին հավանություն տալուն և վերջնական խմբագրմանը՝ հանձնարարելով դա կատարել համապատասխան հանձնաժողովին, որի կազմում ընդգրկվել էին Թողրիան, Դողաթովը, Բունիաթ-գադեն[28]:

1932 թ. հունիսի 5-ին Հայկենտրոնականի ՀՍՀ հողժողովումատի տեղակալ Ն. Աղոյանը Խորհրդային Վրաստանի Բորչալուի նախկին գավառի և ՀՍՍՀ նախկին Լոռու գավառի երկու հողամասերի հետ կապված վեճին վերաբերող գրությունում հայտնում էր, որ այն հնարավոր կլինի լուծել միայն այն դեպքում, երբ Անդրկենտրոնականից ստանան իսկական պլանշետներ, որի համար առաջարկվում է միջնորդություն հարուցել Կենտրոնականի առջև[29]:

1933 թ. փետրվարի 27-ին ՀՍՍՀ ժողովխորհը քննարկում է Ղարաքիլիսայի անտառատնտեսության խոտհարքներն Աղբյուրի, Օփրեթի, Չանախչի, Խոխմեյնի և Բրդաձորի գյուղերի բնակիչներին տրամադրելու մասին Ծովյանի զեկուցումը, որի հիման վրա սահմանվում է, որ ՀՍՍՀ անտառներին սահմանամերձ Վրաստանի և Ադրբեջանի գյուղերը խոտհարքներից կարող են օգտվել նույն կարգով, ինչպես ՀՍՍՀ տարածքում գտնվող գյուղերը[30]:

1933 թ. մարտի 20-ին ՀՍՍՀ Կենտրոնականի նախագահ Անանյանին ուղղված պաշտոնագրում Անդրկենտրոնականի նախագահի պաշտոնակատար Տերեղուովը նշում էր, որ Վրացական և Հայկական ԽՍՀ-ների միջև վարչատնտեսական սահմանի հաստատմամբ Բորչալուի շրջանի տարածքի մի մասն անցել է Հայաստանին: Միաժամանակ հայտնվում էր, որ այդպիսի վիճակը Աղբյուրի, Խոխմեյնի, Բրդաձոր և Օփ-

րեթ գյուղերի համար ստեղծել է դժվարություններ և խոչընդոտներ խոտհարքներից, ՀԽՍՀ-ին անցած տարածքի անտառային մարգագետիններից, խոտհարքներից և վարելահողերից օգտվելու հարցում՝ տեղեկացնելով, որ նախորդ տարիներին նշված հողերից օգտվելը կարգավորվել է ՀԽՍՀ անտառային վարչակարգով: Դրանում տեղեկացվում էր Անդրիհողժողկոմատի մարտի 11-ի հեռագրի մասին, որը ուղարկվել էր հայկական կողմին՝ խնդրանքով նշված տեղամասերը՝ Վանքի-Թալա և այլ տեղամասերը թողնել Բորչալուի բնակչության օգտագործման ներքո: Սույն գրությունում ընդգծվում էր, որ հարցի հետագա հանգուցալուծումը հանձնվել է Անդրկենտրոնի հայեցողությանը, մինչ այդ խնդրելով նշված տեղամասերը թողնել թե՛ Բորչալուի շրջանի և թե՛ ՀԽՍՀ անտառտնտեսության օգտագործման ներքո[31]: 1933 թ. մարտի 26-ին ՀԽՍՀ Կենտրոնի լսում է ՀԽՍՀ հողժողկոմի հաղորդումը Վանքի-Թալայի և այլ բացատների վարելահողերից օգտվելու մասին, նշելով, որ ԱԽՖՍՀ ժողկոմատի կողմից միջնորդվել է Անտառժողկոմատի առջև թույլատրել Բորչալուի շրջանի կոլտնտեսություններին մինչև հարուցված խնդրի վերջնալուծումը օգտվել Վանքի-Թալա և մյուս բացատների վարելահողերից[32]:

1933 թ. մայիսի 15-ին Անդրկենտրոնի նախագահը Անդրիհողժողկոմատին ներկայացրած զեկուցագրում հայտնում էր, որ մայիսի 4-ի որոշմամբ կազմվել է հանձնաժողով Բորչալուի և Ալավերդու շրջանների միջև հողօգտագործման և վարչական ենթակայության հարցերի կարգավորման նպատակով: Տեղեկացվում է այդ նպատակով Անդրիհողժողկոմատի կողեգհայի անդամ Դահրամանովի գլխավորությամբ և Վրաստանի ու Ադրբեջանի հողժողկոմատների, Բորչալուի, Ալավերդու շրջանների և Սադախլուի ներկայացուցիչների մասնակցությամբ կազմված հանձնաժողովի մասին, որը մայիսի 11-ին ձեռնամուխ է լինում տեղում ծագած խնդրի լուծմանը[33]: Արդյունքում պարզվում է, որ ՀԽՍՀ բնակիչների հարուցած վեճը, կապված Սադախլուի շուրջ գտնվող գյուղերի հողերի զավթման հետ, չի համապատասխանում իրականությանը, որ փաստացի հողօգտագործումը Սադախլու գյուղում իրագործվում է ըստ 1929 թ. սեպտեմբերի 2-ի որոշման: Անդրկենտրոնի հանձնաժողովը գտնում է, որ վեճի մասին հայտարարությունը ՀԽՍՀ քաղաքացիների կողմից արդար չէ, և այդ մասով հարցը սպառված է՝ ասվածին կցելով հանձնաժողովի 1933 թ. մայիսի 11-ի արձանագրությունը: Հանձնաժողովը եզրահանգում է, որ վարչական ենթարկվածության տեսանկյունից Չանախչի, Աղբյուրի և Բողաձոր գյուղերը պատկանում են Բորչալուի գավառին: Հանձնաժողովը հայտնում էր, որ 1929 թ. սեպտեմբերի 2-ին Անդրկենտրոնի կողմից՝ ըստ Վրաստանի և Հայաստանի միջև հաստատված սահմանի, նշված գյուղերը անցել են Հայաստանին: Արձանագրվում էր, որ, մինչև 1929 թ. սեպտեմբերի 2-ի սահմանի հաստատագրումը, այդ գյուղերը վարչական առումով ենթարկվում են Վրացական ԽՍՀ-ին և օգտվում տեղական մարգագետիններից, ինչպես խոտհարքներից: Եզրահանգման մեջ սակայն նշվել էր, որ տնտեսապես Աղբյուրի, Չանախչի և Բողաձոր գյուղերի բնապատմական պայմանները պարտադրում են շաղկապվել Բորչալուի գավառի հետ: Խնդիրը ներկայացնելիս Անդրկենտրոնի հողհանձնաժողովը հանգել էր այն հետևության, որ նշված գյուղերի հետագոյն ժամանակ իբր վերջիններիս բնակիչները հայտարարել են վարչական կարգով Բորչալուի շրջանին ենթարկվելու իրենց ցանկության մասին, չնայած բնակչության կազմը հայկական էր: Ըստ Անդրկենտրոնի 1929 թ. սեպտեմբերի 2-ի որոշման՝ անտառին տալով ջրաբաժանման հարցը կարգավորող բացառիկ պաշտպանական բնույթ դրա հիման վրա վերջինս տրվում է Հայաստանին՝ դնելով այն Դարաքիլիսայի անտառտնտեսության օգտագործման ներքո: Ընդգծվում էր, որ անտառային հովիտները նախկինում եղել են մերձակա վրացական գյուղերի օգտագործման ներքո՝ հանդիսանալով նրանց մատակարարման միակ աղբյուրը և ֆերմայի կերակրողը, որ դրանից նշված գյուղերը օգտվել են իրապես սահմանագիծը անցկացնելիս՝ վարձակալության համար դեռևս 1924 թվականից վճարելով ՀԽՍՀ անտառտնտեսությանը, իսկ

վերջին շրջանում իբր թե Ղարաքիլիսայի անտառտնտեսության կողմից հարուցվել են խոչընդոտներ և արգելքներ այդ գյուղերի առաջ անտառային բացատներից օգտվելու հարցում՝ պահանջելով եղջյուրավոր անասունները դուրս բերել ձմեռանոցներից՝ անգամ անտառային հեծելապահակների միջոցով դիմելով զինված ուժի: Հետևապես գտնելով, որ Ղարաքիլիսայի անտառտնտեսության կողմից այդ բնակիչներին խոտհարքային հանդակներից զրկելը կհանգեցնի անասունների ոչնչացմանը, ինչպես նաև նկատի ունենալով տնտեսական ու բնական-պատմական պայմանները և գյուղացիների ցանկությունը՝ հողհանձնաժողովը առավել նպաստակահարմար է գտնում նշված գյուղերի նկատմամբ վարչական ղեկավարությունը թողնել Բորչալուի շրջանին: Ծագող վեճերի կանխարգելման նպատակով և հաշվի առնելով այն հանգամանքը, որ փաստական հողօգտագործումը գտնվում է Հայաստանի տարածքում՝ հանձնաժողովը անհրաժեշտ էր համարում միջհանրապետական սահմանը փոփոխել այնպես, որ Չանախչի, Աղբյուրփի և Բրդաձոր գյուղերի կողմից փաստական հողօգտագործումը անցնի Վրաստանին, իսկ ամեն տարի անտառային հողահանդակների շուրջ ծագող վեճերի կանխարգելման համար անհրաժեշտ է համարվում դրանք մերձակա գյուղերին տալ երկարաժամկետ վարձակալական հիմունքներով[34]:

1933 թ. հունիսի 26-ին Անդրկենտգործկոմի հողհանձնաժողովը լսում է Բորչալուի և Լոռիի շրջանների միջև հողօգտագործման սահմանների ճշգրտման ու հողահանդակների վարչական ենթակայության հարցը: Ըստ այդմ՝ հրահանգվում է որպես հիմք նկատի ունենալ Անդրկենտգործկոմի հողհանձնաժողովի 1933 թ. մայիսի 7-ի որոշումը Վրաստանի և Հայաստանի միջև գոյություն ունեցող հանրապետական սահմանի վերանայման մասին, որով Չանախչի, Աղբյուրփի և Բրդաձոր գյուղերը պետք է դուրս բերվեին Հայկական ԽՍՀ-ի կազմից և հանձնվեին Վրացական ԽՍՀ-ի տնօրինությանը՝ ընդունված վճռի մասին անհրաժեշտաբար տեղեկացնելով համապատասխան հանրապետությունների ԿԿ-ների եզրահանգմանը[35]:

Անդրկենտգործկոմի 1933 թ. հունիսի 17-ի արձանագրության քաղվածքից տեղեկանում ենք Բորչալուի և Ղարաքիլիսայի շրջանների վարչատնտեսական հարցերի ճշգրտման մասին, որի հիմքում ընկած էր Անդրկենտգործկոմի 1932 թ. մայիսի 4-ի որոշումը: Հունիսի 17-ի որոշումով հանձնաժողովի կողմից անտառային բացատների մասին Անդրկենտգործկոմի որոշման վերջնական խմբագրումը հանձնարարվում է Թողրիայից, Ղողաթովից և Բունիաթ-գաղեից կազմված Անդրկենտգործկոմի հանձնաժողովին[36]:

1933 թ. հուլիսի 19-ին հողժողկոմ Ա. Անանյանը և հողվարչության պետ Ա. Սարաֆյանը ՀԽՍՀ Կենտգործկոմ են ներկայացնում պաշտոնագիր, անդրադառնալով Անդրկենտգործկոմի Փոքր նախագահության հունիսի 17-ի նիստի որոշումներին՝ կապված Բորչալուի և Ալավերդու շրջանների միջև եղած սահմանագատից փոփոխությունների հետ: Հայտնվում էր, որ իրենք համաձայն են Անդրկենտգործկոմի հանձնաժողովի եզրակացության հետ՝ Չանախչի և Բրդաձոր գյուղերը Խորհրդային Վրաստանի վարչական ղեկավարության տակ թողնելու վերաբերյալ միայն այն պայմանով, նոր սահմանների գծումը կատարելիս չխախտվի անտառտնտեսության միասնությունը, չտուժեն այդ տնտեսության շահերը[37]:

1933 թ. օգոստոսի 3-ին ԱխՍՖՀ-ն Կենտգործկոմին, Ալավերդու շրջգործկոմին է ուղարկվում ՀԽՍՀ Կենտգործկոմի նախագահության նիստի արձանագրությունը՝ կապված Ալավերդու և Բորչալուի միջև ընկած գյուղերի հողօգտագործական-վարչական սահմանների ճշգրտման մասին ԿԿԿ քարտուղարի զեկուցումը, որը որոշել էր.

1) հավանություն տալ Անդրկենտգործկոմի ընտրած հատուկ հանձնաժողովի եզրակացությանը և Վրաստանի տարածքին կցվելիք Չանախչի, Աղբյուրփի և Բրդաձոր գյուղերի փաստական օգտագործման ենթակա հողակտորները տրամադրել այդ գյուղերին՝ երկարամյա վարձակալության հիմունքներով.

2) ՀԽՍՀ անտառաժողովումատին լիազորել տեղում մասնակցելու սահմանագծման աշխատանքներին[38]:

1934 թ. փետրվարի 13-ին Անդրկենտգործկոմի փոքր նախագահության նիստը դարձյալ լսում է Բորչալուի գավառի և Ալավերդու շրջանների միջև վարչատարածքային սահմանազատման մասին հարցը և որոշում.

1) հաստատել Բորչալուի և Ալավերդու միջև վարչատարածքային սահմանազատման մասին հանձնաժողովի շահագրգիռ կողմերի հավանությանը արժանացած առաջարկը.

2) ըստ նախագահության ցուցումների՝ անհրաժեշտ համարել Վրաստանի կազմում ներառել Աղքորփի, Բրդաձոր և Չանախչի գյուղերը՝ առկա վարչատարածքային սահմաններում, Բորչալուի և Ալավերդու շրջանների միջև փոփոխել սահմանագիծը, նշված գյուղերի բնակիչներին իրավունք վերապահել հետայսու ևս վարձակալական երկարաժամկետ հիմունքներով օգտվել Հայկական ԽՍՀ տարածքում գտնվող անտառային զանգվածի նկատմամբ արտոնություններից[39]:

Վրացական ԽՍՀ-ը հողային հարցում երբեք զիջողականության պատրաստակամություն չէր դրսևորում, և ցանկացած առիթ օգտագործում էր վարչատարածքային սահմանաբաժանման խնդրում շահող դուրս գալու համար, որին ՀԽՍՀ իշխանություններն իրենց հերթին ընդդիմանում էին՝ համոզված իրենց իրավացիության մեջ: Դիտարժան է հողային վեճի կապակցությամբ Վրաստանի Կենտգործկոմի նախագահության 1934 թ. մարտի 2-ի նիստը, որում լսվում է Վրաստանի Բորչալուի գավառի և ՀԽՍՀ Ալավերդու շրջանի միջև վարչատարածքային սահմանազատման հարցը: Ընդունված որոշման մեջ հիմք ընդունելով Անդրկենտգործկոմի նախագահության 1934 թ. փետրվարի 13-ի որոշումը որոշվում է Վրացական ԽՍՀ-ին տրված ՀԽՍՀ-ի Աղքորփի, Բերդաձոր և Չանախչի գյուղերը միացնել Բորչալուի շրջանին և վերաբաշխել Օփրեթի և Խոժոռնիի գյուղխորհուրդների միջև այնպես, որ Չանախչի և Աղքորփի գյուղերն ընդգրկվեն Օփրեթի գյուղխորհրդի, իսկ Բերդաձորը՝ Խոժոռնիի գյուղխորհրդի կազմում[40]:

1934 թ. օգոստոսի 14-ին Անդրկենտգործկոմի հանձնաժողովը Չանախչի գյուղում Շահվերդովի նախագահությամբ և Անդրհողաժողովմատի ներկայացուցիչներ Դուկասովը, ՀԽՍՀ և Վրաստանի հողաժողովներ Լ. Հակոբջանյանը և Պ. Մետրևելին, Բորչալուի շրջանային գործկոմի Յուսուբովը, Ալավերդու գործկոմից՝ Ղազարյանը, Անտառաժողովմատի ՀԽՍՀ լիազոր-ներկայացուցիչ Ծովինյանը, Սադախլոյի անտառտնտեսությունից Մարտիրոսյանը, Չանախչի գյուղի Մյասնիկովի անվան կոլտնտեսությունից Ս. Միսկարյանը, Անդրկենտգործկոմի 1934 թ. փետրվարի 13-ի որոշման հիման վրա տեղանքում հաստատում են Չանախչի և Սադախլոյի անտառտնտեսության միջև փաստացի հողօգտագործման սահմանը, որը միաժամանակ դառնում էր սահման Հայկական ԽՍՀ Ալավերդու շրջանի և Վրացական ԽՍՀ Բորչալուի գավառի միջև: Այնուհետև Անդրկենտգործկոմի այդ նույն որոշման հիման վրա անտառային բացատների երկարաժամկետ օտագործման հանձնման համար, նկատի ունենալով Չանախչիի կոլտնտեսության և Սադախլոյի անտառտնտեսության կարիքը, որոշվում է Ջիթհանք, Գոլի-Թալա բնակավայրերը թողնել անտառտնտեսությանը, իսկ Շահմուրադի-Փգեր, Վանքիթամ անտառային բացատները՝ ընդհանուր 105 հա մակերեսով՝ ամբողջությամբ հանձնել Չանախչիի Մյասնիկյանի անվան կոլտնտեսությանը՝ երկարաժամկետ անփոխհատույց օգտագործման[41]:

Հիմք ընդունելով Անդրկենտգործկոմի 1934 թ. սեպտեմբերի 7-ին ՀԽՍՀ Կենտգործկոմի ընդունած որոշումը՝ ընդգծվում էր, որ Անդրկենտգործկոմի 1934 թ. փետրվարի 13-ի որոշման հիման վրա հատուկ հանձնաժողովը օգոստոսի 16-ին Բորչալուի և Ալավերդու շրջանների միջև կրկին ձգարտել է անտառի սահմանը Սադախլոյի շրջանում: Տեղեկացվում էր նաև, որ հանձնաժողովում Հայանտառչինի ներկայացու-

ցիչները բողոքարկել են դրա դեմ՝ ելնելով անտառի խորքերում գտնվող բացատները Բրդաձոր, Աղթորի և Չանախչի գյուղերին հատկացումից, ինչն ընդունվել էր՝ հաշվի առնելով իբր թե Անտառտնտեսության կողմից մթերումների ծախսողման հանգամանքը: Հայտնվում էր Անտառժողկոմատի լիազորի խնդրանքի մասին, որ բոլոր շոշափված հարցերը հարկավոր է վճռել տեղում՝ փաստական սահմանազատման ժամանակ, որի մասին ՀԽՍՀ անտառժողկոմատի լիազոր ներկայացուցիչ Խաչատրյանը վերոնիշյալ դիմումագրում հայցում էր ՀԽՍՀ Կենտգործկոմի միջամտությունը[42]: Այդ կապակցությամբ Անդրանտառժողկոմատի Հայաստանի վարչությունը խնդիր էր դնում կրկին կապվել Մախարաձեի գլխավորած հողահանձնաժողովի հետ՝ ընդունված որոշման հետ առաջացած տարակարծությունները հարթելու համար[43]:

1934 թ. օգոստոսի 4-ին կրկին շոշափվում է Բորչալուի և Ալավերդու շրջանների վարչատարածքային սահմանազատման հարցը՝ կապված Անդրկենտգործկոմի նախագահության 1934 թ. փետրվարի 13-ի որոշման հետ, ըստ որի՝ Աղթորի, Բրդաձոր և Չանախչի գյուղերը հանձնվում էին Բորչալուի շրջանին և բաշխվում Օփրեթի ու Խոզնավարի գյուղխորհուրդների միջև, որի արդյունքում Չանախչի և Աղթորի գյուղերը հանձնվում են Օփրեթի գյուղխորհրդին, իսկ Բրդաձորը՝ Խոզնավարի շրջանին, ինչի մասին տեղեկանում ենք Համավրացական Գործադիր կոմիտեի նախագահ Ֆ. Մախարաձեի գրությունից[44]:

1934 թ. օգոստոսի 10-ին Հողժողկոմին և Ալավերդու շրջգործկոմի նախագահին Կենտգործկոմի բաժնի վարիչ Հախումյանը տեղեկացնում էր Անդրկենտգործկոմի օգոստոսի 9-ի հեռագրային հաղորդագրության մասին, որ Բորչալուի և Ալավերդու շրջանների սահմանները ճշգրտելու համար Անդրկենտգործկոմում օգոստոսի 13-ին որոշվել է հատուկ հանձնաժողովի նշված վայրը մեկնելու մասին, որի համար Անդրկենտգործկոմը առաջարկել էր խնդրի լուծմանը ներգրավել Հողժողկոմատի և Ալավերդու շրջանի ՀԽՍՀ ներկայացուցիչներին[45]:

Անդրկենտգործկոմի հողահանձնաժողովի (նախագահությամբ Ա. Շահվերդյանի, անդամներ՝ Անդրհողժողկոմատից Գ. Ղուկասովը, ՀՍՀ հողժողկոմատից Հակոբջանյանը, Վրաստանի հողժողկոմատից՝ Մետրևելին, Բորչալուի շրջգործկոմից՝ Յուսուպովը, ՀԽՍՀ Անտառժողկոմատից Ծովինյանը, Սադախլոյից անտառագործ Մարտիրոսյանը և այլք) 1934 թ. օգոստոսի 15-ի արձանագրությունում կրկին փաստվում է Անդրկենտգործկոմի որոշմամբ Աղթորի գյուղը Բորչալուի գավառին հանձնելու մասին: 1934 թ. օգոստոսի 23-ին հողժողկոմ Վ. Մամիկոնյանը և հողշինբաժնի վարիչ Գ. Համբարձումյանը Հայկենտգործկոմին հայտնում են, որ Անդրկենտգործկոմը հանձնարարել է Ալավերդու շրջգործկոմի մասնակցությամբ տեղում ճշգրտել Բորչալուի և Ալավերդու շրջանների սահմանները[46]:

Իսկ արդեն ՀԽՍՀ Կենտգործկոմի նախագահ Ս. Մարտիրոսյանին հասցեագրված 1934 թ. օգոստոսի 31-ի պաշտոնական գրությունում Անդրկենտգործկոմի նախագահ Ֆ. Մախարաձեն հայտնում էր Բորչալուի և Ալավերդու շրջանների վարչատարածքային սահմանազատմանը վերաբերող Անդրկենտգործկոմի նախագահության 1934 թ. փետրվարի 13-ի որոշման մասին, որով իրավունք էր տրվել Բրդաձոր, Աղթորի և Չանախչի գյուղերի ՎԽՍՀ կազմում ընդգրկման և դրան հարող Հայաստանի տարածքում գտնվող անտառային բացատների հետագա օգտագործման վերաբերյալ: Նշվում էր, որ հակառակվելով այդ որոշմանը, Սադախլոյի անտառտնտեսությունը, որի տրամադրության տակ էին գտնվում դրանք, նշված գյուղերին խոչընդոտել էր խոտհում ձևել: Այսպիսով, դեռևս 1934 թ. փետրվարին հաստատված իրավունքը օգտվել բացատների խոտհումից, հետագայում ամրապնդվել է միութենական օրենքով: Հայտնվում էր նաև, որ անտառտնտեսությունը իրականացնում է միանգամայն անօրինական գործողություններ՝ թույլ չտալով կոլտնտեսություններին օգտվել անտառային բացատներից, ավելացնելով, որ այդ մասին Անդրկենտգործկոմի քարտուղար Թող-

րիան հուլիսի 26-ին տեղեկացրել է ՀԽՍՀ Կենտգործկոմի քարտուղար Դաշտոյանին: Մախարաձեն խնդրում էր կարգադրել Անդրկենտգործկոմի հանձնաժողովի կողմից Սադախլոյի անտառտնտեսությանը հատկացված անտառային բացատում հնձված խոտը հանձնել այդ գյուղերին և պարզել օգտագործման կարգի հետ կապված խոչընդոտների հարցը[47]:

1935 թ. մարտի 19-ին տեղի է ունենում Անդրկենտգործկոմի Փոքր նախագահության նիստը, որը Անդրկենտգործկոմի քարտուղար Թողրիայի նախագահությամբ լսում է Բորչալուի և Ալավերդու շրջանների միջև նոր սահմանների հաստատման Անդրկենտգործկոմի նախագահության հանձնաժողովի ակտերի հաստատման մասին հարցը: Բորչալուի և Ալավերդու շրջանների միջև սահմանագծի հաստատման և Չանաչի, Աղբյուրի և Բրդածոր գյուղերի անտառային բացատներից օտվելու մասին Ա. Շահվերդյանի գլխավորությամբ գործած Անդրկենտգործկոմի նախագահության հող-հանձնաժողովի՝ 1934 թ. օգոստոսի 14-ի և 16-ի ակտերը որոշվում է հաստատել: Դրա հետ մեկտեղ ՀԽՍՀ կառավարությանը առաջարկված էր դիտարկել և Կրաստանի կազմում ընդգրկված վերոնշյալ գյուղերի կողմից Հայաստանին հարող տարածքում գտնվող անտառային բացատներից անխոչընդոտ օգտվելու կարգը[48]:

ՀԽՍՀ Կենտգործկոմի նախագահության կողմից 1937 թ. դեկտեմբերի 25-ին կայացրած որոշման առումով դիտարկման է Շ. Առուշանյանի գեկուցումը կապված հայ-վրացական 1934 թ. հուլիսի 19-ի համաձայնության հետ: Դրանից տեղեկանում ենք ՀԽՍՀ Ստեփանավանի շրջանի Շահնագար գյուղի և ՎԽՍՀ Բաշկիչեթի շրջանի Կաշկաթալա գյուղի միջև «Կուլու-Թաշ» կոչվող հողամասի վիճարկման խնդրով Հայաստանի և Կրաստանի կենտգործկոմների համահավասար հիմունքներով Թիֆլիսում ստեղծված հանձնաժողովի ընդունած 1937 թ. նոյեմբերի 4-ին ակտի մասին: Դրանում հաստատվում էր, որ վիճելի հողամասը, ըստ Անդրկենտգործկոմի հողային հանձնաժողովի նախկինում կայացրած որոշման, գտնվում է Հայկական ԽՍՀ վարչական սահմաններում: Սակայն 1937 թ. նոյեմբերի 4-ի եզրահանգմամբ վճիռ է կայացվում փոխադարձ համաձայնությամբ Կուլու-Թաշի վիճելի հողամասը՝ 40-50 հեկտար տարածությամբ, թողնել Կրացական ԽՍՀ Բաշկիչեթի շրջանի Կաշկաթալա գյուղի օտգագործման ներքո: ՀԽՍՀ Կենտգործկոմի քարտուղարի պաշտոնակատարի հավաստմամբ՝ որոշվում է տնտեսական սահմանը Շահնագար և Կաշկաթալա գյուղերի միջև անցկացնել ըստ ներկայացրած հատակագծի գլխավոր ջրաբաժանով՝ չփոփոխելով պետական սահմանը[49]:

Կարելի է հանգել հետևության, որ խորհրդային իշխանությունները որոշակի կոշտ քայլեր ձեռնարկեցին անդրկովկասյան հանրապետությունների և մասնավորապես հայ-վրացական հողային-սահմանային տարակարծությունները հաղթահարելու և լարվածությունը վերացնելու համար, ինչը նրանց ինչ-որ տեղ «հաջողվեց»: Ուժեղ կենտրոնացված պետության համակարգն իր դերը խաղաց, սակայն ներքուստ իր մեջ պահպանեց ապագա լարվածության հիմքերը, ինչն ազգամիջյան փոխհարաբերություններում կարևոր հանգամանք էր և գործոն, որը բխում էր տարածաշրջանային շահերի զարգացման այդ պահին իշխող միտումներից:

ԾԱՆՈԹԱԳՐՈՒԹՅՈՒՆՆԵՐ

1. Հայաստանի ազգային արխիվ (այսուհետև՝ ՀԱԱ), ֆ. 112, ց. 8, գ. 96, թ. 6:
2. Նույն տեղում, ֆ. 123, ց. 16, գ. 117, թ. 47 և 47 հալ.:
3. Նույն տեղում:
4. Նույն տեղում, ֆ. 112, ց. 1, գ. 280, թ. 24 հալ.:
5. Նույն տեղում, ց. 3, գ. 150, թ. 71 հալադ.:

6. Նույն տեղում, գ. 26, թ. 217:
7. Նույն տեղում, գ. 703, թ. 203:
8. Նույն տեղում, ց. 1, գ. 280, թ. 24 հակ.:
9. Նույն տեղում, ց. 3, գ. 568, թ. 32, 38, 40:
10. Տե՛ս նույն տեղում, թ. 67 (հրապարակվել է՝ «Заря Востока», Тифлис, 22 ноября, 1927 г., N 1582):
11. ՀԱԱ, ֆ. 113, ց. 3, 568, թ. 78, 80 հակ.:
12. Նույն տեղում, գ. 703, թ. 203, նույն տեղում, ֆ. 112, ց. 2, գ. 1407, թ. 203:
13. Նույն տեղում, ֆ. 112, ց. 5, գ. 70, թ. 11:
14. Նույն տեղում, ց. 2, գ. 1407, թ. 66:
15. Նույն տեղում, ֆ. 123, ց. 2, գ. 8, թ. 4-5:
16. Նույն տեղում, ֆ. 113, ց. 3, գ. 703, թ. 134, 192, 194-195:
17. Տե՛ս նույն տեղում, թ. 190-191:
18. Նույն տեղում, ֆ. 212, ց. 2, գ. 1407, թ. 102:
19. Նույն տեղում, թ. 174 հակ., նույն տեղում, գ. 1412, թ. 13 հակ.-14 հակ., նույն տեղում, ֆ. 113, ց. 1, գ. 703, թ. 181:
20. Նույն տեղում, ֆ. 112, ց. 1, գ. 267, թ. 90:
21. Նույն տեղում, ց. 2, գ. 199, թ. 3:
22. Տե՛ս նույն տեղում, թ. 2:
23. Տե՛ս նույն տեղում, գ. 1412, թ. 22:
24. Տե՛ս նույն տեղում, գ. 199, թ. 13:
25. Նույն տեղում, գ. 1412, թ. 87:
26. Տե՛ս նույն տեղում, գ. 227, թ. 12:
27. Տե՛ս նույն տեղում, գ. 681, թ. 47, 54:
28. Տե՛ս նույն տեղում, գ. 232, թ. 20:
29. Նույն տեղում, գ. 681, թ. 46:
30. Տե՛ս նույն տեղում, թ. 34:
31. Տե՛ս նույն տեղում, թ. 43-43 հակ.:
32. Տե՛ս նույն տեղում, թ. 37-38:
33. Նույն տեղում, գ. 232, թ. 21:
34. Նույն տեղում, գ. 232, թ. 21-22, ց. 1, գ. 681, թ. 29-30:
35. Նույն տեղում, ց. 2, գ. 232, թ. 19:
36. Նույն տեղում, ց. 1, գ. 681, թ. 37:
37. Նույն տեղում, ց. 2, գ. 232, թ. 18:
38. Տե՛ս նույն տեղում, թ. 17:
39. Նույն տեղում, ֆ. 112, ց. 1, գ. 681, թ. 28:
40. Տե՛ս Խորհրդային Հայաստանի և Խորհրդային Վրաստանի սահմանային վիճելի հարցերը 1920-1930-ական թվականներին, կազմ. Ա. Բադալյանը // «Բանբեր Հայաստանի արխիվների», 2018, թիվ 126, էջ 112:
41. ՀԱԱ, ֆ. 112, ց. 1, գ. 681, թ. 3-5, 83-84:
42. Տե՛ս նույն տեղում, թ. 7-8:
43. Տե՛ս նույն տեղում, թ. 9:
44. Տե՛ս նույն տեղում, թ. 18:
45. Տե՛ս նույն տեղում, թ. 14-15:
46. Տե՛ս նույն տեղում, թ. 13:
47. Տե՛ս նույն տեղում, թ. 10:
48. Տե՛ս նույն տեղում, թ. 54, 85:
49. Նույն տեղում, ֆ. 112, ց. 3, գ. 328, թ. 3:

ԱՄՓՈՓԱԳԻՐ

Հայաստան-Վրաստան հարաբերությունները և հողային-տարածքային
սահմանազատման հիմնահարցերը 1925-1936 թթ.
Վանիկ Վիրաբյան

1925-1937 թթ. սահմանագծին հայ-վրացական հարաբերությունները թևակոխեցին հանգուցալուծման նոր, ոչ պակաս դժվարին փուլ: Կարելի է հանգել հետևության, որ պատմական այս ժամանկահատվածում խորհրդային իշխանությունները որոշակի կոշտ քայլեր ձեռնարկեցին անդրկովկասյան հանրապետությունների, մասնավորապես հայ-վրացական հողային-տարածքային սահմանազատման տարածայնությունները հաղթահարելու և լարվածությունը վերացնելու համար, ինչը նրանց ինչ-որ տեղ հաջողվեց: Ուժեղ կենտրոնացված պետության համակարգն իր դերը խաղաց, սակայն ներքուստ իր մեջ պահպանեց ապագա լարվածության հիմքերը, ինչն ազգամիջյան փոխհարաբերություններում կարևոր հանգամանք էր և գործոն, որը բխում էր տարածաշրջանային շահերի զարգացման այդ պահին իշխող միտումներից:

РЕЗЮМЕ

Отношения Армения-Грузия и вопросы о земельно-территориальном разграничении в 1925-1937 гг.

Ваник Вирабян

Ключевые слова: Армянская ССР, Грузинская ССР, Лори, Ахалкалак, Борчалы, рагра-
ничение, земельный участок, территориально-пограничные споры, граница, договор.

В 1925-1936 гг. армяно-грузинские отношения вступили в новую, не менее сложную, стадию. Можно прийти к выводу, что в данный исторический период советские власти предприняли ряд жестких мер для устранения напряженности и разногласий между закавказскими республиками, в частности в вопросе армяно-грузинского разграничения. И это им в некоторой степени удалось. Система сильного централизованного государства сыграла свою роль, однако внутри стран сохранилась напряженность, что стало важным обстоятельством и фактором в отношениях между двумя республиками. Все это исходило из господствующих тогда тенденций развития региональных интересов.

SUMMARY

Armenia-Georgia Relations and Problems of Land-Territorial Division in 1925-1937

Vanik Virabyan

Keywords: Armenian SSR, Georgian SSR, Lori, Akalkalak, Borchalu, demarcation, plot, territorial-bordering dissensions, boundary, agreement.

In 1925-1937 Armenian-Georgian relations entered a new, no less difficult stage of settlement. We can conclude that during this historical period, Soviet authorities took certain tough steps and somehow succeeded in overcoming land-territorial division disagreements and eliminating tension between the Transcaucasian Republics, in particular between Armenia and Georgia. The powerful centralized state system played its role, but inside it retained the basis for future tensions, which was an important factor in inter-ethnic relations deriving from the dominant trends in the development of regional interests.